

Ч. 33. (68.) Крыница, четверг дня 5. вересня (23. серпня) 1935. Рок II.



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Также просиме присылати членскы вклады до Лемко-Союза.

Просиме присылати материал до календара на рок 1936.



Пренумерата в краю:

30 грошей місячно,  
80 „ квартално  
1.50 „ полрочно,  
3 зл. рочно.

В Америкі: 1 дол. рочно.

В Чехословакии:

2 кор. місячно, 0 кор. полрочно,  
20 кор. рочно.

Кonto чекове Нр. 404.155.

## День 8-го вересня.

### Як будеме голосовати до Сейма.

Листы кандыдатов на послов сут уж окончательно затверждены через окружны выберательны комиссии.

Листы тоты сут розплякатованы в каждой громаді поодыноких округов выберательных.

Для каждого выберателя ест тепер найважнійшом справом: на кого буде дня 8. вересня голосовати? Котры два, або одно назвиско выбере с помедже вшиткых помещеных на выберательных картках?

Призадумуючи ся над тым, каждый выбератель мусит передовсем розважити, котры назвиска будят в нем найвеце довіря и котры кандыдаты стали ся ему дотеперешном роботом найблизши.

Каждый выбератель голосуе лично и може отдати лем оден голос и то в том обводі, где его помещено в выберательных списках.

Сам акт голосованя отбуде ся так: Выбератель, як приде до обводовой комиссии выберательной, котра буде отворена от год. 9-той рано до год. 9-той вечером без перервы, подаст свое имя, назвиско и адрес. Ведучий протокол переконает ся, ци находит ся он в списі выберателей, председатель ствердит его идентичность и даст ему карту голосованя и коперту.

На карті голосованя, котрой образец подае ниже, сут помещены назвиска всіх кандыдатов на послов даного округа в таком порядке, в яком были помещены на листі кандыдатов. С картом и копертом иде выбератель за зроблену заслону и там выбере тоты два або одно назвиско до которого має довіре и поставит при тях назвисках, або при одном назвиску в квадратику ленийкы. Ленийкы можут быти поставлены в якомнибудь напрямі. Пак выбератель вкладат карту до коперты и отдае незаклеєну

предсидательови, котрый при нем мече ю до урны. Два члены комиссии записуют в списках выберателей, же выбератель отдал голос.

На картах можна означити одного, або двох кандыдатов. Если означит ктоси вещь, як двох кандыдатов, то карта буде узнана за неважну.

О годині 9-той вечером председатель зарядит закрыте выберательного помещеня. От того часу будут голосовати лем тоты, котры пришли до голосованя перед годином 9-том; инших, котры пришли по год. 9-той, не допустит ся до голосованя.

### Образец карты голосованя.

Округ выберательный Нр.

Означ двох кандыдатов, на котрых голосуеш, ставяючи в клітці с правой стороны коло их назвиск ленийку. Карту влож до коперты и отдай председателювы выберательной комиссии.

Если не даеш ленийк, уважат ся, же ты отдал голос на кандыдатов помещеных на першом и другом місци.

1) ОСИФ ВЫБЕРАЛЬСКИЙ .

☐

2) ГРИЦ КАНДЫДАТ . . . .

☐

3) ВАСКО КОБАСА . . . .

☐

4) СЕМАН ПУГАРИК . . . .

☐

5) ЮРКО ОДОМАШ . . . .

☐

### КОРОТКИЙ ОПИС КАНДЫДАТОВ НА ПОСЛОВ С ЛЕМКОВСКИХ ОКРУГОВ.

В округі 86-том, обнимаючом Новый Санч и Новый Торг поставлены сут слідуочи кандыдаты:

Гут Павел л. 38. жиющий в Поронині, пов. Новый Торг, господар. С нас не знае его никто, ани он не интересуе ся цілковито нами.

Баляра Михаил літ 31. учитель на Спишу. Незнанный нам и не интересующий ся нашими ділами.

Гвиждж Феликс л. 50 ур. в Одровонжу пов. Н. Торг. редактор недільника: „Господарж Польскі” помещат в своей газеті артыкулы о Лемковщині, занимает в них позицию для нас доброжелательну, яко председатель Головного Правленя „Звѣонску Подгалян” старат ся о навязане с нами близших отношень в ціли экономичного поднесеня наших гор.

Бодзьоны Якуб л. 49. управитель школы в Хелмцу пов. Новый Санч. Сын хлопа, жие для села и для хлопа. Міста его не любят, зато на селі має великий мир. До справ русских относит ся доброжелательно и справедливо.

Лобозинский Ян л. 37. председатель Пов. Отділа „Звѣонску Инвалидов Военных” занимает ся ділами инвалидскыма и містовыма. Селом не интересуе ся.

Округ 85. обнимающий пов. Ясло Горлицы и Ропчицы.

Дух Казимір, бывший заступник министра Социальной Опеки. Лемкам дал ся познати, яко бывший староста в Новом Санчі и с часу, коли был заступником воеводы в Кракові с самых добрых сторон. До нашего населеня относит ся справедливо и помагат ему, где може. За его попертем Руска Бурса в Горлицах достала в р. 1929. субсидию в сумі 22 тысячей злотых, што помогло ей



до обновления своей деятельности и спасло от руины.

Бурда Осиф л. 39, жиющий в Лисові пов. ясельского, господар, трудит ся в місцевых организациях сельских, єст членом Повіт. Выділа в Яслі, Краковской Палаты Рольной, Пов. Комисии Рольной и т. д. Нашима ділами не интересує ся.

Едынак Ян л. 43, с Пашина пов. ропчицкого, совітник в Министерстві Рольном и Реформ Рольных. Мог бы много помочи, если бы захотіл поинтересовати ся нашима ділами. Ближе незнаный.

Вєнява-Длугошовский Казимір, л. 57, войт с Бобовы. Трудит ся в организациях рольных, єст членом Пов. Выділа. До нас относит ся радше недоброжелательно.

Округ 77. обнимающий пов.: Кросно, Сянок и Лєско.

1) Остафин Осиф, инженер, дыректор школы рольной в Суходолі, интересує ся справами села и господарком рольном. До русских діл относит ся без ненависти и справедливо.

2) Соловій Володимір, властитель фольварка в пов. лєском, украинец.

3) Моравский Осиф, поміщик с Одреховы, пов. сяноцкого, знаный с добрых сусідських отношень с нашима священниками и с народом.

4) Августьинский Станислав, емерыт.



## На кого голосує руске населенє Лемковщины.

Руске населенє Лемковщины выбрало окружны комитеты по ділу выборов для округов Новый Санч, Ясло и Сянок. Члены выбранных комитетов старали ся узнати общий суд руского населения Лемковщины относительно поодынокых кандыдатов на послов и перевели ряд бесід с нашима сознательными людьми на селах. С бесід тых выходит ясно, што наше населенє интересує ся живо ділом выборов и має выробленный свой личный суд о кандыдатах на послов.

I. В окрузі выберательном **Новый Санч** высказує ся ціле наше населенє за кандыдатуром поміщенных на третом и четвертом місци карт голосованя, а именно за бывшим послом,

ФЕЛИКСОМ ГВИЖДЖОМ

и

управ. школы, ЯКУБОМ БОДЗЬОНЫМ, котрых знає и має до них довірє.

II. В окрузі **Ясло** полным довірєм лемковских сел тішит ся

КАЗИМІР ДУХ,

поміщенный на першом місци выберательных карт, котрый так, як покойный министр Пєрацкий, вырос межде нами, ходил до гимназии в Новом Санчі, приязнил ся с нашим руском молодежом школьным и давал выраз той приязни так, яко староста С Новом Санчі, як и погодивше, будучи вице-воеводом краковским и вице-министром. Ему завдячує выдатку помоч Руска Бурса в Горлицах, котрой он выстарал ся о субсидию в сумі 22.000 зл., што дало нам возможность розвинути ей діяльність и принимати учачу ся молодеж.

Кромі личности Казиміра Духа, котра, як уж выше сказано, тішит ся полным довірєм, мніє наших горлицких сел єст розділене; одні сут за Вєнявом Длугошовским, други за Едынаком, тож нехай каждый выберат другого посла, кого уважат за найблизшого собі и до котрого має найбільше довірє.

III. Як знаме с численных писм, одержанных с повітов кроснянского, сяноцкого и лєского, має руске населенє округа

**Сянок**

также своего доброго патрона, котрого дарит полным довірєм. Тым доброжелательным для руского населения кандыдатом єст **МОРАВСКИЙ ОСИФ**,

поміщенный на третом місци выберательных карт

и

инж. **ОСТАФИН ОСИФ**,

поміщенный на місци першом карт голосованя.

Оба они трудят ся на селі, серед хлопа, знают єго долю и потребности и интересуют ся всіма проявлениями культурального и экономичного житя.



## Кредыт 7-милионов злотых на молочарство.

Рішено уділити в Державном Банку Рольном кредыт в сумі около 7 милионов злотых на цілі молочарскы. Кредыт тот єст перезначеный на розбудову и заосмотрєнє в отвітне устройство техничне промысла молочарского.

Головны условия того кредыта будут слідуочи: Час треваня кредыта, перезначеного на будову, розбудову, ремонт и т. п. поміщенє молочарских усталено на літ 40, кредыты на купно машин и техничного устройства на 15 літ, причом достава машин має быти так сорганизована, штобы дати возможность достати тоты машины на добрых условиях. Кредыт на повышшу ціль буде низко процентный, сплаты рат будут уняты в формі амортизации с дочисленєм невеликих квот на процент.

С кредыта будут могли користати в першой мирі тоты молочарні, котры зможут отограти певну ролю в експорті, в дальшой мирі лем тоты молочарні, котры будут продукувати масло на рынky внутрєнный.

Молочарскы кооператывы, числячи на такий кредыт будут пересылати поданя посредством „Związku Spółdzielni Rolniczych i Zawodowo-Gospodarczych R. P.” евентуально єго отділов в порозумленю с Рольными Палатами.

Одночасно „Zw. Sp. Roln i Zar.b.-Gosp. R. P.” приступил до оголошеня конкурсу на выготовленє проєктов (в кількох типах) будынков для молочарєнь разом с инсталациом машин. По оголошеню конкурсу всі молочарскы будынки будут будованы отвітно тым проєктам.



ПОМІЩАЙТЕ  
ОГОЛОШЕНИЯ  
В ГАЗЕТИ „ЛЕМКО”

## Начинают добре и пожиточне діло.

В неділю, дня 25. серпня т. р. отбыло ся во Флоринці ново-сандеского повіта информацийне собранє в цілі сориєнтованя ся о возможностях основаня в том районі молочарского кооператыва. На собраню явили ся людє с доокрєстных сел, котры по выслуханю річєвого реферата о молочарстві и користях, пливучих с добре веденой молочарні, приняли живу участь в дискуссии, чим выказали велике заинтересованє ся молочным промыслом. Многы бесідники ударили на того, же по переведеной комасации грунтов увеличилось количество сїна и паши, пасовиска поправили ся, причом коровы, маючи недалеко добры пасовиска дають вєще молока. На увеличенє количества молока впыват также и того, же газда, маючи вєще сїна и паши, кормит коровы лучше, а неоден держит вєще коров. Тож молоко появилось ся по наших селах, біда лем в том, же нїт єго кому продати и именно тота біда наганят людям розум до головы и они хотят основати у себе молочарский кооператыв, котрый бы занял ся переробком их молока на масло и таким способом помог им в спродажі молока.

Шмарена мысль барз добра. Она на правду може поднести наши горскы господарства пашны, молочарскы и выхова живины.

На цілом терені, населеном лемками сут чудны краєвиды, студена и смачна вода, здоровый воздух, але грунт каменистый и яловый. Росне на нем невеличкий овсик тай дробнєнька бандурка. Хлїб купуєме каждого року, аж и при наилучших уроджаях и все сами бесідуєме, же недостаток хлїба не докучат нам нигда так, як недостаток паши. С того видно, же и тепер явят ся паша и живина фундаментом нашего существования и же на паші и живині операме наш быт. Тож если паша и живина дають нам основу быта, то треба доконче попровадити нашу господарку так, штобы с каждым роком мати той паши вєще и штобы наша живина была гардша. Мы мусиме перестати силити ся на того, штобы одержати дуже хлїба с наших господарств, бо на горских жбырках, при остром климаті єст барз трудно осягнути в том добры результаты, але мы знаме, же инши народы, жиючи в горах, хоч не мають власного хлїба и тог хлїб купуют, жиют добре, може аж и лучше от народов, жиющих на низинных уроджайных землях.

Неправда єст, же горы сут бідны. Нїт, горы мають также свои богатства, неменьши от низин, лем треба уміти их найти. На горах мусит ся иначе господарити и господарку примінити до гор, а не горы до господарки. Паша горска єст для живины лучша, здоровша и смачнійша, тож треба дбати о пашу и выпасати на ней живину. Добре откормлена живина, особенно корова заплатит нам в молоку и мясі за наш труд и пашу лучше, як жид за пшеницу. Але треба также постарати ся о рынок продажи для того молока и нменно, на собраню во Флоринці показало ся, же наши людє здають собі точно справу с того, што може облегчити их долю.

Собранє препоручило выбранным на собраню участникам заинтересовати справом молочарского кооператыва населенє сел: Богуша, Білцарева, Вафка, Флоринка, Поляны, Берест, Брунары, Яшкова, Снітница



и Чарна и списати тых людей, котры приступили бы до молочарского кооператыва с поданєм числа держаных коров. Выбраны участники собраня мають зроби́ти тото в продолженю трох неді́ль, штобы уж на слі́дуючом собраню, назначеном на 15 вересня во Флорынці можна было прийняти конкретны рішеня.

Добра то и користна робота, лем доконче треба ю перевести до конца. Добра тым больше, же, як выше в днешном числі газеты подаєме, Державный Банк Рольный може на таку ці́ль уді́лити долготерминовий (на 40 літ) и низкопроцентный кредит.

Над тым послідным повинни призадумати ся наши люды и в других повітах, всяди там где ніт на місци збыта на молоко, а пасовиска сут дост добры.

### Собранє кооператывне во Флорынці.

Собранє рішило основати во Флорынці молочарню, штобы поднести матеряльный быт нашого селянина. Собранє поручило перевести всі подготовительны работы выбраному комитету. В состав комитета вошли: от Флорынки — Дідович Юрий и Габура Григорий, от Снітницы — Ставиский Ваньо и Кузмич Игнатий, от Полян — Дзьобко Осиф и Полянский Ваньо, от Камяны — Жук Михал и Гогоц Василий, от Брунар — Трохановский Василь и Войтович Дмитро, от Білцаревы — Трохановский Андрей и Дідович Васко, от Вафкы — Кузяк Максим и Татусько Дмитро.

В задачу комитета входит: 1) выбор в своем селі молодых способных людей на молочаров штобы их выслати в молочарні на практику, 2) агитация в своем селі за приступленєм в члены молочарні и списованє числа коров поодынокых членов, 3) управленє подготовительныма работами.

Перше засіданє комитета назначено на неді́лю 15 вересня т. р. в читальні во Флорынці. Тогда мають всі комитетчики здати реляцию со своєю працы и предложити спис членов и коров.

В виду льгот, які дає Рольна Палата, єст дуже на часі застановити ся над том справом и приступити до открыта молочарні, кстра хоц в части може уллучити тяжке матеряльне положенє селян в Грыбовщині.

Участник.

### От наших читателей.

С многих лемковских сел достає редакция численны писма в ділі выборов, котрых с браку місца помістити не може. Списем тых однак выходит, же

1) всі рускы села повіта

**Ного-сандецкого**

отдадут свои голоса на:

**ФЕЛИКСА ГВИЖДЖА**

и на

**ЯКУБА БОДЗЬОНОГО**

2) всі жителі повітов:

**горлицкого и ясельского**

будут голосовати на

**КАЗИМИРА ДУХА**

и довольного другого кандидата


3) руске населенє повітов:

**креснянского, сяноцкого и леского**  
попре своим голосами кандыдатуру:

**инж. ОСТАФИНА ОСИФА**

и

**МОРАВСКОГО ОСИФА.**



### ЯК ВЫПАСАТИ ГУСИ НА ПРОДАЖ.

Гуси належат до домашних птахов, котры поплачат ся ховати, бо єст попыт не лем на пірє и пух, але и живы гуси вывозит ся масово до других держав. Поплатность годовлі гусей єст в том, же гуси поза короткым часом вчасной молодости, можут быти кормлены самом травом, адже барз дешево. Помимо того доходы с гусей сут невеликы и то именно прото, же газдыня, багнучи, жебы тот доход был относительно якнайвысший, не уміє совсем обчисляти по купецкы.

Начнийме от так вселюдно приміняного подскубованя молодых гусей. Передовсем тот звычай треба доконче понехати со взгляда на боль, яку задаєме птахам. Боль тот єст не меньша, як при вырываню волосов чело́вікови. Єст то адже варварство кары-досто́йне, котре на домір злого приносит вещь шкоды, як користи. Газдыня - правда достає притом кус піря, але молода гуска мусит спотребовати моц отживчого материяла на порост піря и прото не росне. Єст то одна с головных причин, же наши гуси сут назагал малы, зносят маленькы яйца, с котрых вылягают ся дробны гусятка.

Гуска росне аж до поздной осени, тож если ю в том часі подскубе́ме, то, річ ясна, перестает расти и нигда с ней не буде великий и тяжкий птах. А треба знати, же други краи купуют птахы, в том числі и гуси, на вагу, платячи за 1 кг. штук великих и тяжких доро́ше, як за 1 кг. птахов дробных. Страты на величині не покрьє жадном міром зыск на невеликом количестві піря.

Гуси продає ся переважно в осени. Понеже, як уж сказано выше, шту́кы тяжши сут платны относительно лучше, прото просте обчисленє выказує, же газда повинен старати ся, штобы в том часі гуси были выпасены. На самой траві гуска выросне добре, але не буде толста. В зависимости от часу, коли в данной окрестности гандляры начинают скуповати гуси, треба приступити до их подкормленя. Звычайно выстарчат на тото 2-3 неді́ль.

Если адже наміряме продати гуси от н. пр. 15 жолтня, то найпозднійше 25. вересня треба начати их кормити. Термины тоты треба понимати прикладово, бо они сут ріжны в рі́жних місцевосаях краю. Гуси кормят ся знаменито на мішанині муки со збераным молоком и невеликого количества бандуркы с додатком сыра.

При случайности подає ся, же до хову надают ся лучше гуси стары, бо они несут векши яйца и лучше выховуют гусятка. Гуси стары мають мясо тверде и лыковате и прото на продаж и на мясо надают лучше ся гуси молоды.



### КОРИСТИ С ГОДОВЛІ СВИНЕЙ.

Годовля свиней єст у нас распространена, а то про рі́жны користи, котры она дає. Свиня єст зві́рятом, котре іст вшитко, тож хованє свині не представят жадных трудностей. Если аж и на господарстві бра́кне даякой паши, то при годовлі свиней єст ю легко заступити иншом и то с добрым результатом.

Свиня єст зві́рятом, выкористуючим барз добре приняту пашу и перерабляючом на мясо всі отпадкы рольного господарства, котры иначе было бы трудно продати або выкористати. Выстарчит вычислити, же такы паши, як ху́де молоко, жентыца, поло́ва и аж и бурян свиня выкористує и замі́нят на мясо. Молоды свині знаменито роснут на самой зеленой па́ші, або на пасовиску. Понеже, як знаме со статыстык, запотребованє вепровины єст у нас в містах што раз векше, прото при теперешных низких цінах зерна, може поплачати ся кормленє свиней хлі́бом.

Хованє свиней має велике значенє для господарств на легких грунтах. Господарства готы с регулы терпят на недостаток соломы, котрой выходит дуже на стелі́нє и на сі́чку. Прото так живина як и коні стоят нераз по ко́ліна в навозі, бо газда жалує соломы. Гною прото єст не лем мало, але єст он планший, бо с под коней, яко занадто сухой и горячий надає ся меньше на легкы грунты. Свині натомі́ст вымагают относительно меньше соломы и даю́т гной перепое́ный вильгитю и тому барз отвітный на легкы грунты, бо роскладат ся значно повольнійше, як конский, або овечий. В Ні́меччині на господарства, котры маю́т легкы грунты, берут головну масу ста́енного навоза с под свиней.

Заохочуючом стороном годовлі свиней єст тото, же свиня, особенно солони́нова удає ся в условиях примитивных. Не вымага́т ани ко́штовных буды́нков, ани великих вы́датков на ядерны паши, ани сам материял до выпаса не єст доро́гий. С той причины годовля свиней, особенно в малых господарствах, повинна розвивати ся щтораз больше.



### ЖЕЛІЗНОДОРОЖНА КАТАСТРОФА ПОД ЛЬВОВОМ.

В ночи с 23. на 24 серпня, ме́дже стаци́ями Зимна Вода и Львов, пої́зд скорый Берлин-Бука́рест, і́дущий до Льво́ва вы́ко-  
леил ся. Паровоз и 5 ваго́нов вы́скочило со шин, а вагоны: почтовый, службовый, 1 вагон III-той и 1 вагон I и II клясы перевернули ся. Лью́комотыва и вагон реставра́цийный остали на насы́пі. В катастро́фі 1 особа отнесла тяжкы раны, а 5 легкы.

Причи́ном катастро́фы было віро́ятно роскру́ченє шин.



### ЦІНЫ ЗЕРНА ПОДНОСЯТ СЯ.

Ці́на зерна подносит ся. Явленє тото спостерега́т ся на всіх ры́нках краю уж от кількох дней. Жито нотує ся тепер по 10.50 зл. за 100 кг., а неда́вно ці́на єго вы́носила 9 зл. до 9.75 зл. Тото само діє ся с пше́ницом.



Причиною того повисшеня цін єст мала подаж зерна со стороны рольництва. Тото явят ся также причиною, же в послідных днях вывозит ся барз мало зерна за границу.

Ціны с послідных дней сут слідуючи: Жито нове 10.75 зл. — 11 зл., пшеница 15.25 зл. — 15.75 зл., овес 15 зл. до 15.50 зл., ярец 13.75 зл. — 13.95 зл., отрубы пшен. 9 зл. — 9.50 зл., отрубы житны 7 зл. — 7.50 зл., макухы льняны 16.50 зл. 17. зл. за 100 кг.



## Катастрофа самоходова

### Убита королева бельгийска.

Дня 29. серпня виїхал автом король бельгийский разом с королевой и на дорозі недалеко Люцерны с незнанных причин страшил панованє над керовницом. Автомобиль скрутил в напрямі ку озеру и ударил о дерево. При столкновєню авта о дерево королева бельгийска убыла ся на місци. Король покалічил ся в голову, але раны сут легкы. Шофер, котрый сидил на задном сидженю, вышел с катастрофы ціло.



## Што чути в світі.

Франция высылат до Геневи барз сильну делегацию и сподиват ся недопустити до ухваленя карных санкций против Италии. Франция хоче узнати войну абисынско-италиянску за „експедицию колонияльну” и уговорити Англию, чтобы она также на тото ся згодила. С другой стороны предвиджуют, же Англия буде жадати ухваленя санкции карных против Италии и за таком ухвалом будут голосовати малы державы. С того видно, же война єст певна, лем не знати, ци лем медже Италиом и Абисыниом, ци также и в Европі.

С Москвы доносят, же в Совітах заряджено, чтобы всі жителі міст и пограничных теренов отновили свои паспорта. Новы паспорта будут выданы на 5 літ.

Зарядженє тото позволит перефилтровать советске населєнє.

В Німеччині, в Майнинген мотоцикл, на котром іхалии дві особы, ударил о воз с деревом и станул в поломени. Оба ідучи згынули.

Недалеко Кобурга автобус наїхал на дерево, причом оден пасажер убил ся, а трох єст тяжко ранєных.

На передмістю Берлина наїхал городской автобус на товаровой поїзд. Паровоз поїзда перевернул ся, при чом убила ся 1. особа. 17. особ тяжко ранєных перевезено до шпиталю, а 20 о легкых ранах поміщено в власных домах.

В Америкі росписало Федеральне Т-во ипотечне внутренну пожичку и выпустило облигации на 100 миллионов дол. Перший раз стало ся так, же в Америкі не выкуплено державных облигации. В кругах банковых поясняют собі тот небывалый факт низким опроцентованєм облига-

ции (1 1/2 % рочно) и пересыченєм рынка державными вальорами. Як бы не было, факт сам дає много до думаня.

Италия мала выслати подвоны лодкы на Червене Море, чтобы в разі потребы противдіствовати флоті брытійской. По надто 60 подводных лодок выслано на морскы маневры, які маюť отбыти ся в близости Мальты. Сконцентрировано там также воздушну флоту.

Англия, здає ся, пошила Италию в дурні, бо, як доносят газеты, товариства англицко-американскы законтрактовали великы терены абисынскы, с котрых маюť експлоатувати ропу и други минералы. Основной капитал усталено на 50 миллионов долларов и вступны роботы має ся начати уж в найблизших тыжднях. В виду того, трудно допустити, чтобы Англия позволила Италии завоевати край, в котрый всаджат такую суму грошей.

Италия концентрує воздушну флоту на Средземном Морі. Потворено летнич базы вздолж побережа Сыцылии, котру италианцы хотят зробити подставою контракции. Такая концентрация сил летничих може замкнути брытійским и французским кораблям доступ через Средземне море до канала Суэзского. В том зарядженю досматрjють ся агресивных намірень Италии.

Цисар Абисынии хоче заасекуровати свой личный маєток и маєток абисынского правительства от рызыка войны. В той справі звернул ся до высокого комисара Великой Брытании в Египті. Маєток тот выносит 82 милионы франков.

Рада Лиги Народов сходит ся в Женеві дня 4. вересня. От обрад того засіданя зависит в великой мірі война абисынско-италиянска.

В Америкі президент Рузвелт подписал закон о оподаткованю великих маєтков.

Президент Рузвелт подписал закон о неутральности Сполучєных Держав Америкы Полночной.

А Аргентині, в провинции Кордоба єст небывала о том часі спека. Як відомо Аргентина лежить на полудневой полкулі, где о том часі єст зима. Спека пришла нагло по досит сильных морозах, доходячих до 12 градусов.

На Литві штотраз частійше приходит до штрайков и ріжних манифестации, котры маюť на цілі таким способом высказати своє неудовольство правительству. В дакотрых случаях интервениовала полиция.



### РЕДАКЦИЯ НЕ ОТВІЧАТ:

50 зл. денно заробит каждый, кто займе ся продажом ревелацийного, патентованого вынахода. Каждый склепар, желаючи увеличити свои обороты, повинен держати в склепі наш необходимый каждому до штоденного ужитка артыкул. За офертами писати:

Венедыкт Волявский  
Краков  
ул. Рыдльовка 24.

ОКАЗИЙНО

продаме

**ВОЗОВУ СИКАВКУ**

ДО ГАШЕНЯ ОГНЯ.

СИКАВКА ПРАВИ НОВА — НЕ ПОТРЕБУЄ ЖАДНОГО РЕМОНТА.

За информациями просиме звернути ся под адресом

ЗАРЯДУ СТОРОЖИ ПОЖАРНОЙ  
В КРЫНИЦІ-СЕЛІ.

КТО ХОЧЕ ЗАБЕЗПЕЧИТИ СЯ НА СТАРОСТЬ, АБО ЗЛОЖИТИ ДІТЯМ  
ПРИДАНЕ НАЙ

**заасекурує ся  
в АСЕК. ТОВАРИСТВІ**

**Вита и Краковске  
во ЛЬВОВІ**